

那文毅公奏議

那文毅公奉使與東奏議卷六目錄

卷六

勦辦會匪

告示附

撫卹難民

邵文毅公奉使粵東奏議卷六

男容安恭輯

剿辦會匪

告示附 撫卹難民

嘉慶七年十二月初一日

奏爲查訪永安等縣被賊後情形斟酌籌辦事竊查惠州府屬歸善博羅永安三邑均被會匪滋擾臣抵省後密訪起衅始末緣由已得其梗概並接見自惠州府回省員弁體訪各處近日情形方知歸善本係起事未成旋即撲滅民情業已安堵博羅實係有心謀逆被賊擾害之處雖多經官兵痛加剿

硃

殺渠魁伏誅餘黨已散民怨亦平惟永安係居民
先聚人查拏會匪致賊首曾清浩等糾夥讐殺肆
行焚掠吉慶心存姑息於是自謂撫勝於勦提臣
孫全謀亦自受

硃

恩之後稍生滿假之心往往於匆促間將殺人放火之犯

硃

一經投首卽予釋放回家雖爲解散黨羽起見而
受害之家房屋被燒貲財被掠父母妻子被戕眼
見讐人旣免刑誅復蒙賞賜怒目切齒怨氣沸騰
而殺人之犯且有旣縱之後仍復結黨成羣凌弱
暴寡者官兵來則號爲投誠之人官兵去則肆其

猖獗之狀此民情未服而事後調濟之術頗難爲
理也查粵東濱臨海邊習俗強悍俗有畏威而不
懷德見利而不顧身之語遇此凶頑不法匪徒痛
加殲戮尙知懲創於通省均爲有益若過於姑息
不但被害者難泯其不平之氣卽爲匪之人犯法
而不懼於法難保其不復滋事端但現在匪黨業
經解散間有零星逃竄潛匿深山者亦祇須購線
躡緝毋庸復資兵力搜捕惟身遭荼毒之家若不
亟爲安撫使其弛怨愜心恐啟互相讐殺之漸查
會清浩官粵瓏賴東保三犯是此案元惡罪魁永

殊

安民人無不疾怨據供焚劫凶淫不法已極卽因帶夥投首免其凌遲是已屬法外之仁斷不能復邀寬宥臣與撫臣瑚圖禮會審後卽恭請

殊

王命將該三犯綁赴市曹斬決傳首梟示庶兇徒稍知儆戒而民氣亦可漸平至現在與賊相讐之人亦立有牛頭會名目此中未必盡係良善讐殺之風亦不可長臣已出示曉諭歸善博羅永安民人爾等無論前此分立添弟牛頭會如安靜守法卽屬良民况首惡會清浩等業已伏誅被害之家足以洩忿各宜還家安業如果有曾經殺人在逃未獲之

硃

犯許令指名控告官爲嚴拏審辦毋得私相報復
並復派委員弁星赴該縣一面亟先安插難民一面
購線密訪在逃賊首曾鬼六等務期弋獲毋任漏
網臣拜摺後卽赴惠州察看如果各安生業卽將
吉慶所留彈壓兵丁斟酌陸續撤歸營伍此外應
行辦理善後事宜卽與撫臣瑚圖禮提臣孫全謀
妥議次第經理再查粵省會匪所在皆有聲氣相
通祇可威懾驟難德化此次吉慶於永安投首賊
目往往卽予釋放並加賞賜民心不服而匪徒轉
以滋事爲得計藐玩官法滅而復起投而復叛之

事不能保其必無現在大勢已定斷無復帶兵搜捕之理惟當以懲首惡安良善為要相機設法妥為料理嗣後倘再有蠢動必須痛加剿辦全粵方可冀久安臣愚昧之見謹據實奏

聞再臬司邱庭瀛係始終在事之人情形較熟臣仍帶同前往辦事臣前由江西起程赴粵因奉

旨查訪之事頭緒頗多又有會審緊要匪犯並幫辦撫綏善後事宜恐原帶刑部主事李威係初次隨差諸事未能熟悉一人亦難兼顧路過吉安有丁憂回籍知府劉珪係刑部司員出身臣素知該員誠穩

可信辦事熟練隨帶同赴粵幫理一切俟事竣仍
令回籍守制謹

奏奉

硃批覽

嘉慶七年十二月初一日會同署兩廣總督瑚公
圖禮

奏爲審明永安滋事首匪先行正法事竊惠州府屬永
安縣會匪滋事一案先據原任兩廣總督覺羅吉
慶將投首匪犯曾清浩官粵瓏賴東保三名委員
押解到省臣那彥成抵粵後會同臣瑚圖禮監提

該犯等覆加研訊緣會清浩官粵瓏賴東保均係永安縣人素行遊蕩不務正業賴東保先於乾隆五十二年間毆斃黃亞四擬絞減流遇

赦省釋回籍本年七月間有已死之溫登元起意商同會清浩官粵瓏賴東保與已獲正法之薛文勝鄒狐狸並在逃之謝清錦溫亞禮何亞開曾新林亞着潘姓結拜添弟會遇事互相幫助八月間有青溪牛頭會內藍修文之父藍監生訪知該犯等糾衆結會因博羅會匪滋擾恐該犯等聞風響應隨率衆將溫登元拏獲送縣審訊溫登元旋卽在監病

故該犯等心懷怨恨欲搶殺牛頭會村莊洩忿隨分投糾夥會清浩官粵瓏賴東保薛文勝鄒狐狸各糾得三五百人不等並溫亞禮等分投逼脅入夥共有二三千人屯聚於縣屬之天字嶂適博羅餘匪曾鬼六逃至該處見該犯等聚集人衆勸令起事曾鬼六仍回博羅潛匿會清浩官粵瓏賴東保隨俱自稱爲大王薛文勝鄒狐狸俱自稱爲元帥於九月二十六日祭旗起事會清浩帶匪數百人打劫青溪等處官粵瓏帶匪數百人打劫黃鼎等處賴東保帶匪數百人打劫中埔圍其餘夥匪

亦各打劫附近村莊該犯等所至之處焚燒房屋
姦淫婦女殺戮無辜不可勝數經官兵進剿於大
鍾嶺九禾市等處勦殺後賊匪各自逃竄會清浩
官粵瓏賴東保畏懼各帶夥匪百餘人赴營投首
嚴訊堅供實因被牛頭會捉拏起衅所糾夥匪均
係添弟會內之人一時烏合會鬼六仍回博羅現
在不知去向等語加以刑夾矢口不移查律載謀
反大逆者凌遲處死又例載不法匪徒潛謀糾結
復興天地會名目搶劫拒捕者首犯擬斬立決等
語今會清浩官粵瓏賴東保因挾牛頭會拏之

嫌膽敢分糾黨羽至二三千人之多焚掠村莊姦淫婦女殺戮無辜卽與謀逆無異該犯等各率夥匪自爲一股應各以爲首論雖均係自首到案按殺人之例不准首免况該犯等焚殺村莊多至數十處兇殘已極卽因其自首免其凌遲已屬法外之仁斷難復邀寬貸臣等會審後卽恭請

王命飭委代理按察使事南韶連道朱棟署督標中軍副將唐光茂將會清浩官粵瓏賴東保三犯綁赴市曹斬決梟示仍傳首永安等處地方示衆以彰

國憲而快人心其在逃之曾鬼六謝清錦溫亞禮何亞

開會新林亞着潘姓均係緊要賊目已派委員弁
購線捕拏務期弋獲毋令漏網謹

奏

嘉慶七年十二月十六日軍機大臣字寄奉

上諭那彥成奏查明博羅永安等縣會匪滋事緣由及吉
慶辦理此事顛末覽奏俱悉已有明降諭旨矣又據另
奏審明永安滋事首匪先行正法一摺會清浩官粵瓏
賴東保三犯因挾指拏溫登元之嫌膽敢分糾黨與至
二三千人之多焚掠村莊肆行不法兇惡已極實難曲
邀寬貸卽因其自首免其凌遲緣坐已屬法外施仁豈

得賞其死罪珣圖禮那彥成於審訊明確後將該三犯
斬決梟示辦理尙是其在逃之會鬼六等犯均係緊要
頭目務須嚴拏弋獲按律辦理不可任令漏網此外零
星逃竄之犯潛匿深山亦祇須購線躡緝自可無庸復
資兵力至摺內所稱現在與賊相讐之人亦立有牛頭
會名目等語此項牛頭會民人於添弟會匪滋事之初
先將首犯溫登元擒拏送官本無不合但愚民糾衆立
會同干例禁不但添弟會滋事之犯必須嚴辦卽牛頭
會之名目亦不可有珣圖禮那彥成當詳悉出示諭以
現在歸善博羅永安等處添弟會滋事匪徒糾衆焚掠

不法已極經官兵大加剿殺明示創懲其永安首犯會
清浩等三名吉總督未經定擬今已奏明正法梟示爾
等公忿已洩至糾衆立會大干例禁爾等本係良善之
人自應凜遵王法現在幫同剿賊惟當稱爲鄉勇義民

若設爲牛頭會名目則一稱牛頭會一稱添弟會均干

殊

無功而反有罪矣

法紀所有牛頭會名目爾等惟當永遠革除不得再有

此名不許再

糾結倘經此次曉諭之後不知悛改仍前邀結多人設
立會名甚至藉衆滋事又與添弟會何異王章具在決
不輕貸如此剴切曉諭庶該省民人漸知斂戢自不致
復蹈糾衆結會惡習至會鬼六等犯此時既尚未就獲

亦可責令伊等幫同訪拏更易踪跡至惠州現有善後事宜應行經理那彥成馳赴該處惟當察看情形妥爲籌辦其前此留防官兵卽可陸續撤回原伍再那彥成摺內稱孫全謀自受恩之後稍生滿假往往將殺人放火之犯一經投首卽宣釋回家等語前此永安會匪投首到官紛紛釋放朕卽以此事係總督吉慶主見而孫全謀係提督大員亦有應得之咎續據吉慶奏稱歸善會匪聚衆時提臣孫全謀將兵安於城上營汛礮位收回等語砌圖禮摺內亦有孫全謀辦理永安會匪專主招安之語本日那彥成摺內亦云孫全謀於投首之人

遂行釋放以致受害之家怨氣沸騰是孫全謀竟有辦理不善之處不可不查辦示儆並著瑚圖禮那彥成再行秉公詳查如孫全謀釋放之犯祇係脅從夥賊其咎尚在可原若竟將爲首之僞總兵等概行釋放甚至現在逃匿未獲之曾鬼六等亦係曾經釋放之犯則其咎甚重卽當據實叅奏候朕酌辦不可因孫全謀於勦辦會匪一事曾經降旨加恩稍存贍徇之見前因吉慶奏稱有恐瑚圖禮將伊作踐之言曾降旨令那彥成查明具奏此時那彥成旣查明吉慶竟係畏罪自盡與瑚圖禮無涉其所稱作踐之處自係病中妄語無庸再行查

奏惟所稱道員朱棟播造謠言一節有無憑據仍當查明據實奏聞此時新任巡撫鐵保已有旨令其卽赴廣東那彥成於鐵保到後卽將惠州現在應行經理之處及查拏逸匪等事交令接辦那彥成卽來京復命可也

嘉慶七年十二月十五日

奏爲察看永安地方情形拆毀山寨飭散鄉勇辦理撫綏民情業已靖謐事竊永安會匪滋擾起於土客相讐臣抵省後已將查訪起衅始末緣由具

奏嗣馳抵惠州察看永安情形該縣地處萬山之中原有前明及康熙年間匪徒作亂時舊築寨柵基址

硃 硃

此次會匪起事修築舊寨分據爲巢到處焚掠其
時遠近居民亦爭趨山僻築寨自固迨匪首投出
後賊夥各自解散大勢已定惟被焚被劫村莊受
其荼毒口擊受撫之匪晏然無事心懷不平積忿
之餘竟有不聽官令仍糾衆私相讐殺者以故鄉
勇團聚之處凡潰散餘匪不敢遽行回家有仍依
山寨負隅爲固者有曰則在家夜則上山寨躲避
者是寨柵不拆則百姓不安而團結之鄉勇不撤
餘匪依舊不散現在總當破其相持之勢而後可
以杜其構衅之萌當卽出示曉諭禁止讐殺凡投

硃

出被脅餘匪令該縣取具族隣甘結聽許安業一面飭委現駐永安之右翼鎮總兵楊世華惠潮嘉道胡克家將各處山寨俱行拆毀其是旋據該鎮道等陸續稟報已拆毀山寨九十餘座收繳器械數百件內有民築避賊現係空虛之寨恐將來匪類佔據又致滋事隨飭令一律平毀其離城窩遠山僻小徑訪聞尙有匪寨數處該匪等尙不能放心恐鄉勇等乘間讐殺不敢下寨者每處約有數十百人不等已飭該鎮道等設法解散並密行躡探其中必有著名賊目潛藏在內務在不動聲色嚴密

殊

緝拏毋令遠颺再臣沿途查看時攀輿呈訴者不

下數百人俱以家被焚劫制憲仁慈將賊釋放恐

復遭殺害爲詞查閱呈內羅織多人係先經脅從

現已悔罪者甚多而牽連讐陷亦居其小半愚民

無知總以盡殺會匪而後快意現當賊氛甫靖若

按名紛紛查拏少有變端轉不成事體惟添弟牛

頭兩會實有不相並立之勢若竟不戮一人現在

呈控之衆既不能服而他處之添弟會尙在觀望

亦不知所懲畏日來兵役並鄉民陸續緝獲賊目

官粵鳳等解送臣親提研訊據官粵鳳陳良益劉

亞鳳林榮彬江波泰江亞茂賀爛滿賀石養會亞
九謝開信謝亞魁陳景魁游亞火楊亞四楊和彩
曾勇漢曾勇遠謝亞九等十八名均供認隨同起
事放火殺人屬實又吉慶審辦薛文勝一起內擬
遣八名尙在惠州監禁未經起解臣復提研訊內
鄭聘鳳馮清魁二犯亦據供認隨同焚劫不諱現
俱傳到指名仇家質証確實該犯等放火殺人兇
殘已極亟宜立正典刑以平衆怨臣審明後恭請
王命飭委惠州府知府楊楷惠州協副將張士英將官輿
鳳等二十名綁赴市曹卽行斬決其餘賀有瑞等

二十八名僅止聽從入會並未隨同焚劫照例擬
遣另行咨部朱學廷等四名訊係被脅服役飭令
該縣取保安插臣復傳集紳衿耆民諭以嗣後無
論添弟牛頭會人安分守法均爲良民此時首匪
已誅卽兵役民人縛送各犯訊明曾經焚殺各有
讐家指名者均已正法爾等怨憤可釋若再有不
平紛紛讐殺則是不遵官令大干法紀等語明白
曉示該紳衿耆民等傳諭鄉勇各自省悟相率呈
繳器械存案亦皆解散至各縣稟報被擾村莊永
安共計八十餘處博羅共計一百六十餘處凡賊

踪所經之地焚燒一空瓦礫滿地觸目慘心殊堪
憐憫業經署督臣瑚圖禮奏請緩徵照水旱之例
撫卹小民自不致失所惟俟查勘完竣造冊給票
始行散放恐需時日臣已劄委原任藩司常齡督
同同知丁如玉薩克丹泰李騰霄知縣李應均等
查辦博羅惠潮嘉道胡克家督同通判王衷知縣
沈權衡楊桂蔭楊時行等查辦永安各趕緊分投
查勘並卽飭令總理軍需局臬司邱庭澂撥給銀
米帶往查清一處卽散給一處務使難民均沾實
惠速得安生復業所有查辦章程另開清單恭呈

御覽臣復以賊匪猖獗之時內有被脅不從抗志捐軀與夫捐貲守城奮勇捕賊者此等或節烈可風或義勇足尙亟宜彰表以快人心隨遍貼告示飭各該縣確切查訪俟查報到日再行

奏請分別旌賞連日以來各處難民聞現獲匪徒按律懲辦業已悅服又因查辦撫卹生者蒙活命之恩收錄節義死者邀身後之榮感頌

皇仁歡聲載道瘡痍頓起憤怨胥平洵足仰慰

聖懷再查粵省向無魚鱗煙戶冊保甲之法久未遵行臣

飭令各該縣就查勘撫卹之便編查保甲既足以

聯鄉里之情又可以稽查奸宄之伏似在善後事宜中不可不辦之事其應行如何斟酌舊制參合時宜俟臣遍查情形定有條制再與署督臣瑚圖禮會商歸於善後事宜摺內具奏謹將撫綏章程逐條開列恭呈

御覽謹

奏

一被挾村莊業經署督臣瑚圖禮奏明照水旱之例賑卹查水旱成災原視災分之重輕分別賑濟之多寡此次博羅永安賊匪所劫村莊房屋

均被焚燒貲財均被搶掠應請均照九分災之
例極貧給賑兩個月每天口每日給米五合小
口減半照例價折銀散給

一查造戶口最易淆混非濫卽遺每致因循朦混
應令各委員帶同地保逐戶挨查卽取具地保
甘結每查清一村立時散給一村隨將每戶大
口若干小口若干明白書於木榜張示釘掛村
口俾衆共知其有浮報戶口者一經查出除本
戶不准給賑外並將地保重懲如此則胥吏無
從欺冒而被難災黎得以實沾

豈惠早安生業

一舉貢監生例不食賑其貧生內有被焚劫最苦者報明該學教官造冊一體給領至家貲殷實及有藝業營生者概不准賑濟

一房屋修費定例草房一間給銀五錢瓦房一間給銀一兩查粵東均係瓦房且遭焚劫最苦應請每間給銀一兩以資修蓋奉

硃批知道了

嘉慶七年十二月十五日

奏臣前奏查明博羅永安拒賊捐軀節婦義民請給

旌表一節若按名照例給予牌坊銀兩似覺過費且將來
呈請竟無了期臣已於軍需項下撥銀一千兩每
縣給銀五百兩於附縣地方建立祠宇令將查出
被難死節人名書於木牌亦足以示表彰勸勵之
意如此辦理似屬便捷卽無庸照例咨部以節糜
費理合附片奏

聞伏祈

睿鑒謹

奏奉

硃批覽

嘉慶七年十二月二十四日

奏爲辦理拆寨撫卹情形事竊臣抵惠後因呈告會匪

滋事時被賊焚劫懇求搜捕者不下數百人當將
續獲官粵鳳等五十名分別正法發遣並將飭散
鄉勇禁止讐殺拆毀山寨九十餘處各緣由具

奏並聲明山僻小徑訪聞尙有匪寨數處在案從前已
拆各寨如錫坑獺狸紅石頭角坑等寨最大均係
鄉勇讐殺躲避之餘匪俱經諭散有業可歸者各
自安業無業可歸亦俱編插於各村令該村紳耆
約束並諭該紳耆等亦不得因其曾經從匪遂致

作踐各已安插妥協連日以來據總兵楊世華惠潮道胡克家陸續稟報派令兵役在於深山窮谷之中各處搜查將零星小寨俱已拆毀淨盡並續獲頭目僧化成等十四名又陳有達一起前經吉慶釋放九名內今復行拏獲練文錦廖錦梅監齊政陳光益四名另行解惠審辦惟距縣八十餘里之鐵籠嶂上有寨柵一座寨內匪徒不肯投出亦不敢滋事等情臣以該處山勢險惡人跡罕到其中恐有著名賊目藏匿在內隨飭令廣布線人密探路徑毋令驚竄去後旋據該鎮道等覆查該處

硃 硃

山勢懸崖陡壁高數百丈山上有凹地寬可里許
四面無路可通惟有鳥道一綫須攀援旋繞而上
該匪等於山口築石堵禦未知寨內虛實隨在下
盤獲葉閏興一名訊據供稱伊素在該處砍柴自
十一月中旬賊口龔釐戕膽等陸續搬運上山併
妻子俱在寨內約有百餘人係畏鄉勇讐殺躲藏
並不敢出而滋事山上的人都素不認識却不知
曾鬼六有無在內等語臣伏查該寨雖甚險峻但
山勢孤聳正在絕地隨派委博多歡伊昌阿惠州
府楊楷等前往會同該鎮道等在於留防兵內挑

撥五百名將該山周圍有路可通之處全行挖斷
刨壕立塹絕其竄逸之路一面遣人上山諭以祇
誅首惡脅從罔治如有縛獻首犯者不惟免罪并
加重賞倘負固不出竟是顯違官令彼時大兵一
到後悔無及等語剴切曉諭該匪等猶懼下山後
被義民讐殺尙存狐疑查該匪等雖不敢滋事又
不肯投出是其心終不可靠伏讀

聖諭若任其日久藏匿勢必搶掠口食山內居民豈不遭
其蹂躪仰見

燭照萬里洞悉軍務情形臣不勝欽佩之至現今提臣孫

硃

全謀以閱兵爲名親赴該處察看臣又飭令該鎮道等在於該山周圍嚴密布置該匪等倘知悔悟投出卽將著名頭目照例擬罪具奏其餘脅從仍照錫坑獺狸等寨分別安撫倘始終負固抗拒有必須兵力勦捕之處臣亦不敢過事姑息以致養癰貽患總期相機酌變使首匪不倖逃法網而餘犯不妄遭誅戮以副

聖主恩威並用之至意至各處撫卹戶口臣因時屆歲暮窮民無食恐有搶竊等事若俟前奏章程奉到

諭旨後始行散放實屬緩不濟急臣不揣冒昧已劄知各

委員卽照前奏極貧給賑三個月次貧給賑兩個月每房一間給銀一兩之例查清一村卽散給一村使難民均沾實惠早安生理日來據各委員等稟報博羅已散給十分之八九永安已散給十分之四五均於年底可以一律完竣各處居民均感荷

皇仁領賑之日扶老攜幼遠近歡呼現在墟市貿易耕作如常足以上紓

聖慮臣統俟各處辦理完竣後派員各處抽查並卽行履勘將來安設營卡之地一切善後事宜擬定後再

回省與署督臣會商具

奏至現獲之僧化成等十四名並續獲之練文錦等四名內有屢次焚劫或手下曾管領數十百人不等之犯俟解到另行分別審擬具奏謹

奏

嘉慶七年十二月二十四日

奏竊查博羅縣羊屎坑內之伯塘墟建有

關帝廟本年陳爛屐四起事時赴廟卜往東南永安利

否

神賜籤往東南不利往西北吉該匪等將

神像擡行卽向西北响水一帶焚劫正值提臣孫全謀帶兵由此路進剿賊敗入羅溪營又被攻克該匪等怨

神不佑膽敢毀

像棄擲查柏塘墟赴永安甚近當日該匪等若直奔東南會合永安匪徒居民被禍更慘事更難辦伏查關帝自我

朝開國以來久著威顯茲於陳爛屐四小醜作亂賜籤誘令遇兵敗潰旋卽授首莫非

神靈默佑速得成功臣因委員查辦博羅撫卹知有此

事隨卽恭塑

神像修整廟宇開光之日四鄉男婦瞻謁者竟有數千

人無不感荷

威靈歡聲雷動應請

賞賜匾額於廟內懸掛俾山陬海澨無知頑民共知爲逆之人

神明不佑終至竄亡以昭靈貺而著明威謹

奏奉

硃批卽行親書發往

嘉慶八年正月十二日軍機大臣字寄奉

上諭那彥成奏辦理拆寨撫卹情形等摺覽奏俱悉據稱
各處零星小寨均已拆毀淨盡惟鐵籠嶂有柵寨一座
匪徒百餘人不肯投出亦不敢滋事等情此種匪徒自
係畏懼鄉勇讐殺是以不肯出投但任其日久潛藏恐
搶掠滋事此時自應相機招撫並出示曉諭以爾等依
山固守自係慮鄉民讐殺起見但會匪中抗拒官兵者
已將首犯賊目陸續拿獲明正典刑鄉勇義民憤怨已
釋並經出示禁止毋許私相讐殺爾等卽本已入會一
經改悔卽係良民自應及早解散各歸生業斷不慮義
民等再有報復倘執迷不悟則是有心違抗大兵一到

概事誅夷噬臍何及如此愷切曉諭庶匪徒等無所疑慮及早來投那彥成即可乘機收撫妥爲安置卽有頭目在內伊旣自知悔悟相率投誠與始終抗拒者有間尙可貸其一死倘竟恃險抗拒自不得不懾以兵威卽應咨催孫全謀等上緊剿捕將爲首之犯擒拏正法其餘脅從夥匪酌量辦理其曾鬼六一犯係起事首惡是否卽在鐵籠嶂寨內應探明嚴拏務獲至所奏撫卹難民各事宜自應如此籌辦所請柏塘墟

關帝廟匾額已卽日親書發往敬謹懸掛用答

神庥那彥成侯倭什布到粵遞相交篆後再行起身來京

供職

嘉慶七年十二月二十八日會同署兩廣總督瑚

公圖禮

奏爲遵

旨覆奏事嘉慶七年十二月二十一日接奉

廷寄

諭旨瑚圖禮奏粵東地方結黨拜會者各處多有惟陳爛
履四家頗殷實平日僱人潛買硝磺打造兵器一節陳
爛履四竟敢配造火藥製辦器械府縣等若早行覺察
立時嚴辦何至釀成事端該處地方官豈非形同木偶

卽瑚圖禮亦不能辭失察之咎究竟該府縣等會否將
陳爛屐四謀逆之事具稟上司何以遷延不辦著瑚圖
禮那彥成據實查奏欽此伏查陳爛屐四係八月初八
日起事該縣於八月初二日卽有風聞拏獲匪犯
謝金秀黎亞姐張庚姐等俱經通稟審辦彼時恐
涉張皇欲嚴密查拏尙非遷延不辦惟陳爛屐四
業已配造火藥製辦器械其蓄謀已非一日誠如
聖諭若早覺察立時嚴辦何至釀成事端前經吉慶將惠
州府知府伊秉綬擬發軍臺効力贖罪博羅縣知
縣劉嘉穎原擬枷號半年欽奉

諭旨著在省柳號一年滿日發往伊犁効力贖罪欽此至

臣瑚圖禮未能及早覺察立時嚴辦咎實難辭應

請

旨將臣交部嚴加議處以示懲儆又奉

諭旨瑚圖禮奏稱逃竄餘匪藏匿深山窮谷所在尙多可
見吉慶所奏永安全境寧謐之語仍屬草率將就了而
未了該匪等逃竄深山若任其日久藏匿勢必搶掠口
食則山內居民豈不遭其蹂躪自應帶兵入山將實在
謀逆之賊搜捕淨盡其餘脅從者不妨量加安撫方爲
正辦著瑚圖禮那彥成體察情形妥爲籌辦欽此伏查

永安大兵撤退之後各處被害居民心懷痛恨欲盡殺會匪而後快意以故團聚之鄉勇不散竟有不聽官令私自讐殺者致潰散餘匪及先經受撫之衆竟竄伏山谷依寨自固臣瑚圖禮那彥成均經出示曉諭飭散鄉勇禁止讐殺並令總兵楊世華惠潮嘉道胡克家將各處山寨全行拆毀臣那彥成駐劄惠郡勒限督催前經奏明拆毀九十餘寨所有投出餘匪飭縣取保安插其獲送之官粵鳳等五十名分別正法發遣並聲明山僻小徑訪聞尙有匪寨數處現在設法解散各在案嗣復據

該鎮道等稟報派令兵役入山搜查將山僻小寨俱已拆毀惟鐵籠嶂尙有匪寨一座內藏百餘人因畏鄉勇讐殺據險避匿不肯下寨亦不敢滋事等情臣等查該匪等雖爲躲避鄉勇起見但藏匿日久勢必復致蔓延且避不肯出必有著名賊目在內臣等已嚴飭該鎮道等將鐵籠嶂一寨務期相機設法速行拆毀並將寨內賊目與脅從之人分別辦理以靖地方而安良善又奉

諭旨吉慶另片奏歸善會匪聚眾滋事時提臣將兵安於城上營汛礮位收回城鄉人心惶恐等語而瑚圖禮奏

片內又有孫全謀於辦理永安會匪專主招安並不剿捕之語從前吉慶屢次摺內均稱孫全謀帶兵打仗甚屬奮勇今此次奏片內竟似叅劾該提督前後自相矛盾孫全謀係武職大員剿賊乃其專責豈有專主招安之理况隨同總督帶兵諸事自由吉慶調度孫全謀安兵城上收回營汛礮位彼時若吉慶以其所辦非是卽當嚴行叅究何待此時始行奏出竟係吉慶知朕降旨查辦輒思諉過他人自佔地步欽此伏查孫全謀剿辦博羅一案帶兵打仗本屬奮勇至永安之專主招安因吉慶業已出示招撫在先孫全謀遂亦未經

認真剿捕在當時固爲解散黨羽起見惟於匆促之間凡投首之犯有曾經放火殺人者未能分別辦理一概省釋回家以致民心不服此實吉慶作主而孫全謀亦因循跟同辦理至將營汛礮位收回城鄉係六月間拾獲匿名揭帖有八月十五攻城之語孫全謀因汛地兵丁較少恐礮位被劫所以收回城內並附近之鄉又移兵近城以爲防範之計所辦尙無大錯又奉

諭旨吉慶保奏軍營出力文武各員紳士一摺除武員唐光茂等已降旨加恩外其文職卹庭澧等各員及紳士

名單均著發交瑚圖禮那彥成覆加查核其中如有冒濫者卽行刪去有遺漏者查明添入另行具奏候朕再降恩旨又據奏博羅永安防守一摺著瑚圖禮那彥成查看該處地方情形再行妥議具奏又吉慶另片奏博羅永安二縣會匪滋事並非勾通洋盜現飭緝拏洋盜等語博羅永安距海較遠此次會匪滋事自未必勾通洋盜但欲緝拏淨盡談何容易著瑚圖禮那彥成飭令員弁實力查拏務使匪徒絕跡欽此伏查博羅永安現在辦理撫卹拆毀山寨之事所有出力員弁紳士除武員唐光茂等業經奉

旨加恩外其餘各員並紳士等統俟事務完竣再行核實
保奏至所奏博羅永安等處添設防兵一節內已
奏之博羅縣羅溪營羊屎山固爲險隘其未奏之
永安縣天字嶂等處地方更爲緊要均須添兵設
汛俟臣那彥成察看回省後再行會商歸於善後
事宜摺內具奏又此次會匪滋事雖非勾通洋盜
而洋盜會匪均須實力查拏方足綏靖地方總兵
黃標於緝拏海盜素爲奮勇此次攻克羅溪營該
鎮亦極出力人所共知臣等已咨會該鎮務將洋
盜實力緝捕以期海面肅清並嚴飭沿海各營縣

一體協力偵緝如逸犯會鬼六等務嚴密購拏以
絕根株謹

奏

嘉慶八年正月初三日軍機大臣字寄奉

上諭據瑚圖禮那彥成同日覆奏查明吉慶辦理博羅永
安二縣會匪情形皆屬已過之事看來吉慶先辦博羅
會匪時尙無濫殺激變情事迨永安會匪滋事吉慶撫
勝於剿一味招安將匪徒盡行釋放以致人心不服私
相讐殺是以於那彥成赴彼時該處百姓尙以總督仁
慈將賊釋放恐復遭殺害爲詞紛紛呈訴是吉慶於辦

理永安會匪一事實屬草率疎縱吉慶業已身故毋庸
置議現據那彥成奏稱陸續緝獲案內隨同起事放火
殺人屬實之官粵鳳等二十名分別辦理並飭委鎮道
將各處山寨俱行拆毀及查勘撫綏被擾村莊所辦皆
是現在拆毀山寨九十餘座收繳器械數百件該處民
情漸就寧帖境內自可肅清惟地方糾會名目斷不可
有愚民等糾衆結會本干例禁今該處因防備添弟會
又立一牛頭會名曰若不嚴行禁止日後私相讐殺必
致如閩省漳泉二府械鬪惡習又與添弟會何異前經
諭令瑚圖禮那彥成出示禁止此旨到時著該署撫再

硃

行出示曉諭以爾等皆係安分良民特因添弟會匪焚

不得已

掠滋擾是以團結相助今添弟會匪業經官兵將首犯

賊目陸續拏獲明正典刑爾等怨憤已釋惟當安靜守

硃

法若仍前聚眾結會則與添弟會匪均干例禁法所難

轉為抗拒之匪徒衆

寬爾等當各自解散速將會名永遠革除如遇有外侮

亦當鳴官究辦不得私行糾眾讐殺致蹈法網倘此次

曉諭之後不知悛改仍前設立會名邀結滋事王章具

在決不輕貸如此剴切示諭庶該處民心知畏法自

可漸除積習其撫綏章程均著照所奏辦理至會鬼六

一犯著瑚圖禮那彥成飭令嚴拏務獲以淨根株其永

安留兵二千名現在地方甫經安戢自當暫留彈壓砌圖禮那彥成當察勘情形如果實就寘謐卽當以次撤回又據那彥成奏詢問孫全謀各條該提督帶兵剿捕於永安會匪投首時均係解交吉慶辦理是孫全謀尙無辦理不合之處

嘉慶八年正月初七日

奏爲永安鐵籠嶂匪徒始終負固現在籌辦事端

臣初

到惠郡時正當良民紛紛呈告並鄉勇私相讐殺之際其時受撫之匪復行竄匿山寨者所在皆有經臣嚴切曉諭飭散鄉勇并分委員弁將山寨竄

匪餘匪招撫歸業隨陸續拆毀山寨九十餘座止
有鐵籠嶂一寨匪徒恃險不肯投出彼時未知寨
內虛實在於山下盤獲樵夫葉閩興一名訊供該
寨四面峭峰中有凹地藏匪百餘人因畏鄉勇讐
殺不敢下寨等語當經奏蒙

聖鑒在案續獲自鐵籠嶂潛逃下寨之張亞三一犯臣細
加研訊據供係被賊邱晚逼脅上寨寨內有黃亞
程曾鬼六溫亞利龔釐戩膽等爲首該處人跡罕
到上年九月會匪滋事時黃亞程聚集匪徒據此
爲巢官兵並未到彼搜捕後來吉總督將會鬼六

溫亞利龔釐戩膽等姓名刊示懸賞購拏所以曾
鬼六等也逃到該處躲避迨大兵撤後又因鄉勇
讐殺利害附近曾經從賊之人也陸續竄往逃匿
此時除婦女幼孩不計外壯丁實有七八百人寨
上豎有紅旗寫富逼良民四字寨門有礮臺二座
內有大礮十個鳥鎗約百把火藥約兩擔草蓆百
餘間糧食約千餘石差去招諭的差役四人都都
被他們害了等語復經提臣孫全謀前往該寨察
看形勢該匪等膽敢吹角聚眾在寨上施放鎗礮
查黃亞程原係在彼藏匿之人而曾鬼六等踪跡

殊

詭秘今復竄聚該處據險自固並將該鎮道等遣
令持示上山招諭之人竟行戕害復見官兵巡察
放礮抗拒其逆迹已屬顯然該匪等上年滋事時
未曾深受懲創竟有輕視官兵之意此次若不痛
加剿辦則匪徒無所畏忌勢必復出滋擾焚掠報
復良民正宜趁此兜圍剿捕以絕孽根惟該嶂四
面陡峭仰攻本屬費力兼之週圍重山疊嶂路徑
分歧該匪等計窮力蹙勢必翻山越竄堵禦剿捕
均須兵力現與提臣會商永安留防之兵丁除派
撥各處彈壓外實在不敷調遣臣已先後札商署

督臣瑚圖禮轉行飛調提標等營兵丁二千名廣州協等營兵丁一千四百名星赴該處嚴密布置相機攻勦料此烏合之衆不難迅速撲滅該匪等叵測居心終虞滋擾趁其勢未蔓延卽行勦辦所謂發之速而事小統俟各路兵齊卽直搗賊巢務期一鼓成擒不留遺孽仍一面刷示曉諭各處民人俾令周知官兵祇誅勦鐵籠嶂抗官逆匪爾等先經受撫各歸村落安生守法卽爲良民毋有驚恐等語明白曉示以安反側之心至各村良民得蒙撫卹深知感激

天恩一聞鐵籠嶂之事無不踴躍赴營告充鄉勇其意雖
半爲快其私讐順其情而用之亦極可以得力謹
奏

嘉慶八年正月二十四日軍機大臣字寄奉

上諭那彥成奏永安鐵籠嶂匪徒始終負固現在籌辦緣
由一摺據稱鐵籠嶂山寨有黃亞程曾鬼六溫亞利龔
鰲戩膽等爲首據險自固並將鎮道遣令持示招諭之
人竟行戕害見有官兵巡察膽敢放鎗抗拒等語該匪
等脅聚多人負隅固守逆跡顯然卽無緊要首逆在內
亦應痛加剿辦俾匪徒知所畏懼况有首惡曾鬼六潛

逃在彼自宜上緊兜圍勦捕淨絕根株那彥成因該處
重山疊嶂路徑分歧恐賊匪等計窮力蹙翻山越竄與
叻圖禮札商飛調提標等營兵丁二千名並廣州協等
營兵丁一千四百名星赴該處嚴密布置相機攻勦務
當趁賊匪勢未蔓延直搗賊巢將會鬼六等犯一鼓成
擒勿留餘孽但祇須勦辦此寨賊匪其餘各處民人仍
當通行出示曉諭以鐵籠障賊匪敢於恃險叛逆戕害
差役抵拒官兵是以不得不加懲創爾等先經受撫各
歸村落即使從前曾經入會但能安分守法卽爲良民
官兵必不稍事株連爾等毋庸心生疑慮惟糾衆立會

大千例禁凡屬善良百姓更應稟遵王法況現在開鐵籠嶂匪徒抗官爾等尙赴營告充鄉勇踴躍急公豈可復私自立會致干法紀所有牛頭會名目爾等當永遠革除毋得再有糾結如此剴切曉諭庶可以靖善良而安反側於勦捕更爲有益所有搜捕鐵籠嶂匪徒之事卽專責成那彥成會同孫全謀辦理鐵保已調任山東巡撫中途聞信自必轉回或已行抵粵東那彥成亦不必將印篆交代惟當俟倭什布到彼接受督篆後那彥成再將撫篆交與瑚圖禮接管所有廣東地方事務交該督撫等專心妥辦那彥成應將鐵籠嶂會匪一事辦

竣再行來京復命至前次發往廣東効用之吳俊於該處地方情形素為熟悉卽著那彥成調至軍營差遣委用

硃 硃

嘉慶八年正月十七日會同廣東提督孫公全謀奏為攻破鐵籠嶂賊巢勦散聚匪生擒首逆黃亞程龔

欽此之至

硃 硃 硃

釐戮膽偽軍師僧寬成偽元帥林亞著等八名並酌撤兵丁事竊永安上年九月間會匪滋事時黃亞程聚夥藏匿鐵籠嶂迨大兵撤退釐戮膽偽僧寬成林亞著邨文龍邨晚邨文佐鄭亞五僧化潘姓卽潘老虎連長并已死之邨文秀未獲之自

硃

鬼六溫亞利等先後竄聚依附該犯及附近拜會

硃

爲匪之人因畏鄉勇讐殺亦陸續逃至該處躲避

硃

除婦女幼孩不計外約有六七百人先經遣役四名持示上山曉諭限以三日投出免死當被拘留

硃

不放又有該處紳士杜仁溥張景仰向爲本處民

人所信服情愿親赴山寨說令投誠乃該匪等愍

可憫另有旨

不畏死竟敢將六人全行戕害實爲可惡之極若

不速行撲滅終爲地方之害而附近觀望之人轉

生反側查該嶂山腰起伏連亘數十里路徑紛歧

而山頂比衆山獨高四面攢峰壁立中有凹地寬

硃

二三里該匪等於山頂周圍築寨四面路徑相通之處俱安設礮臺堆積樁木大石臣等擬俟各路兵齊將各處隘口盡行堵斷然後四圍兜捕以期一網打盡本月初十日署都司宣舒許廷桂守備董定銓千總廖振雄帶兵由嶂背西南一路巡哨該匪等見而施放鎗礮旋有二三百人自山壓下欲行拒敵宣舒等所帶官兵奮勇激烈猛不可遏可畏隨向上直撲臣孫全謀望見卽乘我兵銳氣親自帶兵飛往督勦并先派探路之叅將唐光茂亦飛赴東南七星墩一路幫同總兵楊世華並都司德

殊 殊 殊 殊 殊

昌守備唐文才鄭文麟督兵直撲賊寨遊擊胡俊
鴻達色帶兵由東北貓眉頭一路協剿惠州府知
府楊楷帶領鄉勇在賊之後路上害地方堵剿四
路夾攻賊匪據險分頭抗拒鎗礮並發擲石下撲
我兵人人奮勇喊殺爭先鎗礮迎敵自午至申臣
孫全謀一路之兵殺賊三十餘名賊匪抵敵不住
退上山寨我兵乘勢仰攻用礮轟擊打死十餘人
連奪礮臺兩座都司寧舒許廷桂守備董定銓干
總廖振雄首先搶上山梁又奪佔第三層礮臺總
兵楊世華一路亦鎗斃賊匪三十餘名德昌等亦

俱搶上山腰楊楷所帶鄉勇亦俱佔住山隘賊匪
畏懼退守寨門因時屆酉末天色已黑且賊寨堅
固山路崎嶇難以進攻各就所奪山面劄營欲俟
次早黎明四路並進直搗賊巢詎該匪等見官兵
攻勦利害又因礮臺已被打破三座各賊膽落遂
於是夜五更乘黑由山崖絕壁滾跌四散逃竄經
各路官兵知覺分投追捕痛加勦殺共鎗礮打死
及滾崖跌斃賊匪一百餘名生擒一百十五名隨
飭令官兵與鄉勇等在於附近山內分投搜捕又
陸續搜獲賊匪一百二十九名委員將獲犯研訊

殊

殊

硃 硃 硃 硃 硃 硃

硃 硃

內有偽元帥林亞著、
文龍、
亞晚、
文佐、
鄭亞、
五連、
長六名、
偽軍師僧寬成、
一名看守礮臺頭目、
洗亞、
二凌亞、
魁盧、
毓英、
鍾亞、
門鄭、
益龍、
五名、
又於
殺死屍身、
令鄉勇逐一指認、
內有偽元帥、
邱文秀、
一名鑄造火藥之謝朝信、
一名鑄造礮位之黃得、
升一名、
又於賊寨內搜獲婦女、
幼孩、
一百一十餘、
名、
奪獲大小礮十門、
烏鎗三十九杆、
長矛挑刀三、
十三件、
鉛子二簍、
火藥半箱、
木印三顆、
布旗數十、
面、
又經帶領鄉勇、
搜山之始、
興縣知縣楊桂蔭、
趕至、
吹羅嶂地方、
搜獲首逆黃亞程、
一犯、
惠州府知

殊殊殊

殊殊殊殊殊殊

府楊楷趕至義容山中搜獲首逆龔釐戡膽一犯
原任布政司常齡在藍塘地方搜獲偽元帥潘姓
卽潘老虎曾化成二犯黃亞程被拏時情急拔刀
自刎未死擡至呈驗已不能供飭令該犯族弟黃
亞石認明屬實旋卽鸞割處死並將龔釐戡膽曾
寬成林亞著卹亞晚卹文龍卹文佐鄭亞五曾化
成潘老虎連長十犯訊取供詞後卽在該處凌遲
處死並割取已死首匪黃亞程等首級一併懸掛
犯事地方示衆其頭目洗亞二等五名並曾經與
官兵打仗之葉亞三等八十四名均行斬決餘犯

殊

並以後續獲之犯再行分別辦理所有婦女幼孩
一百一十餘名口飭交該縣訊明隣佑親屬取保
安插山寨立時平毀其未到督標等營兵丁一千
二百五十名已飛札署督臣瑚圖禮卽行停止查
永安會匪未經嘗試官兵而合邑之山亦再無高
險過於鐵籠嶂一處者未經攻破之先居民惶惑
賊亦猖狂茲官兵奮勇一日之內攻破賊巢痛加
勦戮不惟居民歡悅並先經受撫之匪無不震懾
兵威並訊獲犯供稱攻寨之曰衆賊互對啼哭總
言明早官兵一定破寨這樣利害不如大家逃回

硃

散夥等語是該匪等經此番痛懲必不敢再滋事
端惟會鬼六溫亞利尚未就獲研訊龔釐戢膽等
僉供是夜各人逃出自求活命並未商約逃往何
處實在不知他二人下落若逃至隣縣語音不同
必被盤獲不過在各處山洞內藏躲爲苟延殘喘
之計臣現督飭兵勇於深山窮谷中遍處搜捕務
期必獲以絕根株再現在博永兩邑撫卹已竣惟
永安尙有聞賑歸來難民尙須補放鐵籠嶂山之
賊亦勦除殆盡旬日內搜捕完竣後即可將兵丁
撤令歸伍臣等將應當安營設汛之處勘定趕緊

修立營卡應撥之兵卽令駐劄留防之兵可以全撤所有在事出力員弁前會蒙

聖恩令

臣

那彥成與署督

臣

瑚圖禮會查另奏統俟

臣

等

殊

將前後合計秉公會奏量加鼓勵再此次陣亡兵

丁俱各卹賜卹五名滾山未回兵丁一名外委兵丁內受石傷

五十三名均不甚重再

臣

那彥成前奉

諭旨飭查提

臣

孫全謀上年勦辦永安會匪有無辦理不

善之處等因經

臣

查得上年會清浩等聚眾滋事

時吉慶專主招安而孫全謀亦因循附和此則其

辦理未能妥協當經據實覆

奏並聲明現在鐵籠嶂聚匪抗拒如該提督能立破賊巢應仰懇

硃皇上天恩准令將功補過在案茲該提督奮勇督兵於一

日之內攻奪賊巢剿散聚匪雖尚有會鬼六溫亞

利二犯未獲而賊匪剿除殆盡且首逆頭目亦已

殲擒過半辦理尙屬迅速可否將該提督前次辦

理未協之處免其置議出自

硃天恩再博羅縣首逆陳爛屐四之弟陳爛屐五在逃未獲

臣到惠後卽飭該縣嚴密購線緝拏茲據署博羅

縣知縣李雲稟稱正月十三日據差役利華等將

硃

該犯拏獲到案查陳爛屐五係陳爛屐四胞弟上年隨同起事曾經管領多人焚劫村莊荼毒生靈無數茲脫逃數月就獲自應立正典刑臣已劄飭臬司卹庭滌就近訊取供詞卽於該處正法示衆
謹

奏奉

硃批覽

嘉慶八年正月十七日

奏鐵籠嶂賊巢未破時有該縣監生張景仰捐職從九品杜仁溥赴縣告稱情願親往寨內招令該匪等

自行投出該縣素知該職員等爲鄉曲所信服隨
遣令去後被該匪等拘留不放茲將獲犯訊悉該
職員等到寨後匪首黃亞程竟逼令入夥該職員
等辱罵不屈被黃亞程喝令一併殺害查杜仁溥
張景仰素行俱屬端謹今踴躍急公罵賊捐軀洵
堪憫惻該職員等均有子嗣可否照外委陣亡之
例

賞給難廕之處出自

皇上格外天恩謹

奏

嘉慶八年二月初六日

命以內閣學士署理吏部侍郎並交部議敘奉

上諭那彥成等奏攻破鐵籠嶂賊巢勦散聚匪生擒首逆黃亞程僞軍師僧寬成僞元帥林亞著等一摺覽奏欣慰該處添弟會匪徒多半係客籍寄居無業游民因地方土著民人設立牛頭會彼此構鬪上年博羅等處匪徒卽因此起衅當經勦辦完竣並令嚴禁牛頭會名目今鐵籠嶂匪徒恐被牛頭會讐殺築立寨柵自爲守衛原未欲遽加勦辦節經那彥成出示曉諭不但不行解散並將遣去諭令投出之紳士人役等六名全行戕害

實屬叛逆不法那彥成以鐵籠嶂賊匪負嵎抗拒若不
速行撲滅終爲地方之害因會同孫全謀調集官兵四
路攻剿該匪等仍敢據險抵拒官兵等爭先搶上山隘
該匪等始行畏懼俱乘夜由山崖絕壁滾跌逃竄官兵
分投追捕於一日內卽將賊巢攻破共殲擒賊匪四五
百名並拏獲首逆黃亞程僞元帥林亞著僞軍師僧寬
成等按律懲治地方立就肅清辦理妥速皆由那彥成
調度得宜所致文憲現出學差那彥成著加恩以內閣
學士署理吏部侍郎並交部議敘那彥成未到以前仍
著瑚圖靈阿署理提督孫全謀前次附和吉慶專主招

撫此時賊匪內卽有經該提督釋放後仍行滋事者是
孫全謀本有應得之咎姑念此次剿捕鐵籠嶂伊親白
督兵迅速辦竣功過尙足相抵都司寧舒許廷桂守備
董定銓千總廖振雄首先搶上山梁均屬奮勇知縣楊
桂蔭趕至吹羅嶂地方搜獲首逆黃亞程甚屬能事寧
舒許廷桂董定銓廖振雄楊桂蔭俱著交部議敘其被
害之紳士杜仁溥張景仰著照外委陣亡例賜卹遣役
四名著照兵丁陣亡例賜卹至曾鬼六溫亞利二犯係
起事首惡現在逃逸應飭令地方文武上緊緝拏毋令
漏網其該處居民並當出示曉諭以鐵籠嶂匪徒當出

示招撫時若肯自行投出解散夥黨必當予以生全斷不輕加誅戮詎該匪等不特不知悔罪且將遣去官役一併戕害逆跡顯然若稍事姑容則兇徒無所做畏今官兵一到搗破賊巢不逾日卽將匪黨悉數殲除可見孽由自作國法難逃爾等惟當勉爲良民安分謀生毋得自作不靖致罹法網如此明白曉諭更足以安善良而消反側永安地方甫經寧謐所有被難民人前經奏明撫卹那彥成自應在彼督率妥辦俟倭什布一抵廣東瑚圖禮那彥成遞相交卸篆務並將撫卹事宜交該督飭屬經理務使實惠及民那彥成卽起程來京供職

其原任藩司常齡隨在軍營搜獲偽元帥潘老虎等二犯尙爲出力並著那彥成帶同進京候朕降旨

嘉慶八年二月初一日會同廣東提督孫公全謀奏爲永安全境收靖撤兵藏事事竊照官兵攻克鐵籠嶂賊巢業經將剿辦情形恭摺奏

聞在案查永安會匪因從前大兵調集時見擒賊不卽嚴誅妄測意存招撫竟至夜郎自大目無法紀故復有鐵籠嶂聚匪不散抗拒官兵之事經此番痛加攻剿一日之內搗穴焚巢狐鼠之羣殄殲擒馘略盡合境人民於欣快之中彌懷震懾臣等曰在山

中往來駐劄察看避難民人紛紛襁負而歸趕緊修理房屋畊種春田前經委員分投撫卹按口給銀業俱完竣百姓感戴

皇仁比戶相慶其墟場市集數月來幾於空無人煙今則負戴襍還蔬米盈闔扶老攜幼來都者無不歡形顏色光景極爲熙恬查百姓當賊起之際以官兵早到爲幸迨乎事定又盼兵去而農安臣等察看現在永安全境可以放心所有各處調赴之兵亟應全撤祇留該縣原舊營汛及善後議添之兵足資彈壓其各路糧臺亦應次第撤去早節糜費已

督飭文武員弁迅速妥協辦理其各處鄉勇或隨
兵打仗或作眼拏賊俱經隨時獎賞但此等鄉間
團結之民宜散而不宜聚現在諄飭各鄉衿耆將
此項鄉勇速令歸農毋得仍前結聚並欽遵

諭旨出示曉諭不許再結牛頭等會滋事尋獲白羅法網
一面委員分赴各鄉取具不敢讐殺甘結至賊匪
與官兵抗拒其先經從賊拜會之人連口來竟有
爲兵勇作線擒獲著名首匪者訊供知其曾入會
爲匪意欲擒賊免死此等畏懼似出真情亦一體
與以賞賜查良民原易撫慰而脅從最難安插臣

等曰夜思維卒無善策今當兵威大振之後正可乘此機會妥爲辦理隨派知府嵇承閑帶領委員赴各處就撫之家明白開導亦令其出具悔罪不敢爲匪亦不敢容留匪人甘結存案據該匪等欣然樂從極爲踴躍以爲出結之後官可信我必不究辦義民讐殺亦可據以控告是因畏懼之餘轉得安插之道刻下不但民與賊相讐賊難容足且賊能擒賊威法方爲大振想來不致復有他虞查鐵籠嶂內賊匪茅棚三十餘座止可容數百人當日殲擒者除婦女幼孩不計外實有五百數十名

續又搜獲埋屍數十具連日以來據各員弁民役
又拏獲首匪鄒鳳翔等六十六名統計臨陣殲戮
及先後搜擒不下七百餘人是該寨聚集匪徒業
已搜捕殆盡現雖會鬼六溫亞利兩犯在逃未獲
若山谷窮竄一役之力可以就擒臣等將續獲之
鄒鳳翔等委員研訊內鄒鳳翔一名係已正法賊
目鄒狐狸之子與黃亞程等爲首又曾新曾義溫
亞二謝滿四名均係匪目又張亞三一名聽從已
正法匪首黃亞程下手殺死紳士張景仰杜仁溥
當將鄒鳳翔凌遲處死曾新曾義溫亞二謝滿張

亞三五名梟首其餘林振清等均行斬決隨飭尋
獲被害之紳士張景仰杜仁溥二人屍身傳喚其
家屬厚加賞卹令其收葬並將張亞三與前正法
之黃亞程首級委弁賞赴蠟石地方祭於其家卽
於該村懸掛俾衆目共覩以洩公忿而慰幽魂臣
等查此事大局已臻完善連日將善後事宜辦定
與署臣勘圖禮札商會銜具

奏卽將此事責成於原任藩司吳俊令該員留駐永安
督同府縣妥爲辦理其在逃之會兇六連日獲犯
研訊據供該犯平日嗜酒賭錢好與人鬪訟粵省

稱爲爛崽卽北省之所謂匪類泥腿富會匪起事
時民人等恨其無賴卽將其名首列控告此次鐵
籠嶂匪徒拒抗係黃亞程龔齋戕膽鄉風潮爲首
溫亞利係溫登元之姪遂亦推之爲大王又因會
鬼六略能識字故爲軍師等語現在分飭安聯員
弁兵役於永安交界各要隘處所帶領線目改裝
易服設法查拏該犯係奉

旨購拏之人自知不能倖脫此時不過潛伏巖洞或躲匿
坑蔡卽使餓斃白戕亦總有屍身踪跡可以尋驗
現在自當撤兵安民爲要卽責成於該地方官訪

拏斷不至於漏網臣那彥成於拜摺後卽回至惠郡料理數日再行回省再此次永安會匪滋事前督臣吉慶原奏係博羅會匪曾鬼六於官兵攻勦時逃至永安復行糾聚是該犯在兩處滋擾勾結實爲首逆渠魁節奉

諭旨飭拏至再至三臣督令文武員弁各處搜查杳無踪影前在青溪時拏獲鐵籠嶂匪犯逐一向其跟究曾鬼六下落總無與該犯認識者其時卽有言其並未在鐵籠嶂之內臣恐係員弁等久緝無獲畏難飾卸及回駐苦竹派派役復加體訪該犯係博

羅石壩村人石壩距苦竹派僅止十里境壤相錯
苦竹派多有認識會鬼六之人知其本係黃姓之
子名黃亞二隨母改嫁曾姓名鳳蘭混名鬼六曾
做過石匠又能出戲略識字義因游蕩失業喫酒
賭錢拜會遇事與人尋衅又替人做狀取利苦竹
派人受其擾累恨者頗多查粵東稱人之狡譎者
爲鬼六以此人俱稱之爲曾鬼六其實永安天字
嶂鐵籠嶂兩處會匪屯聚該犯是否在內毫無憑
據臣復詢之員弁等俱稱上年永安會匪起事吉
慶駐劄苦竹派該處民人赴控因平日屢被該犯

擾害銜恨徹骨誣列該犯之名謂其到永安爲首
糾衆造反冀圖雪恨其時吉慶因博羅之匪已經
戡定永安又有匪徒屯聚誠恐

聖明斥責故於具奏摺內聲敘該犯在博羅地方經官兵
攻勦逃至永安復行糾聚以見其並非另起其實
若果有勾結情事亦斷不能一人前往臣那彥成
所獲各犯不下千人何以並無一博羅人在內是
博永會匪判然兩事以此可見臣仍未敢信以爲
實適獲到該犯之弟曾亞問據供與所訪相同並
稱該犯於上年十一月內出門不知去向或因從

前曾在沿海一帶山中打石此時聞查拏緊急下
海逃逸亦未可定等語臣恐係曾亞閏狡供仍督
飭文武嚴行查拏今又獲到首逆溫亞利帶赴省
城會同督撫鞠訊據溫亞利堅供並不認識曾鬼
六伊上年會到苦竹派趁圩聽聞人說曾鬼六係
博羅爛嶂常到苦竹派擾害村人以此人都恨他
伊於天字嶂鐵籠嶂兩處起事屯聚並無曾鬼六
在內止有鄒鳳翔混名鄒鬼六均同官輿龍龔釐
戩膽等稱爲大王等語反復研究矢口不移查鄒
鳳翔業經拏獲正法粵東土音鄒與曾相似其曾

鬼六之另爲一人及並未越境糾聚在鐵籠嶂抗拒官兵核諸地方輿論與伊弟曾亞聞及現犯溫亞利供辭俱已昭合是該犯不過曾經拜會之地方棍徒將來弋獲後亦不致重辟但係奉

旨嚴拏之人今

臣

訪訊既確不敢不據實奏陳以紓

宸廑除仍交督撫督飭地方文武認真查緝獲後務將該犯詳細訊究是否逆首抑並未作亂僅係會匪之處另行陳奏謹

奏

嘉慶八年二月初一日會同署兩廣總督瑚公圖禮

奏爲道缺緊要懇

恩補放以資整飭事竊廣東惠潮嘉道胡克家係臬司耶
庭澧取中門生業經

奏請迴避在案例應與隣省道員對調惟查惠潮嘉風
氣獷悍土客襍處往往結會樹黨辦理一不得人
遂至釀成事端現在博永兩邑賊匪淨殲大勢已
定惟調劑土客招集流亡清查叛產及一切保甲
善後事宜均須次第籌辦恐新調人員不能熟悉
情形轉於地方無益殊有關係原任山東藩司吳
俊歷任粵省十有餘年該員素日官聲與其才具

久在

聖明洞照之中現蒙

恩飭令來粵効力

臣

等知其於該處風土人情實爲熟悉

已將擬定善後章程委交該員督率料理

臣等不

揣冒昧謹請將該員與以降品頂戴補授惠潮嘉

道專其責成若辦理不善以致地方有事惟該員

是問

臣

等爲地方需人起見謹公同商權意見相

合至原任廣東藩司常齡居官操守廉潔爲人誠

實自軍興以來辦理諸務極爲認真前在博羅亦

曾帶兵打仗此次鐵籠嶂卽其首先查出稟報又

復拏獲曾化成潘老虎二首犯惟二人俱係兩司

大員其可否

施恩之處出自

皇上天恩謹

奏

嘉慶八年二月十九日軍機大臣字寄奉

上諭那彥成奏永安會匪靖謐情形一摺覽奏俱悉其另
摺奏惠潮地方民情強悍請准惠潮道就近調兵以資
彈壓一摺已交倭什布辦理矣再前任山東布政使吳
俊據稱現將永安善後事宜專責該員如已將善後一

切辦理完竣卽著帶同來京另候錄用如尙有經手事件卽交與倭什布俟事竣後卽飭令來京候旨

嘉慶八年二月初一日會同署兩廣總督瑚公圖禮
提督孫公全謀

奏爲酌籌博羅永安二縣善後事宜分晰臚陳事竊查博羅永安二縣會匪滋事擾害閭閻業經次第殄滅綏靖茲當撤兵之際民漸歸農亟宜妥籌善後以期永遠乂安臣等相度情形公同商榷該二縣雖皆附近惠州而疊嶂層巒紆迴險阻幅幘四至遠至一二百里其中都圖里約大小崎零查以前

如天字嶂等處奸民爲患動至十餘年今得幸其
初起立即撲滅更宜妥爲辦理以絕亂萌是目前
之務莫要於力行保甲添設兵防繕修城郭而添
弟牛頭二會從前角立紛起名有民賊之分實樹
競爭之勢今賊平事定則二會均應遵

旨立法申禁永杜弊端至若廓清境宇禁造刀鎗凡民寨
賊寨鐵廠鐵爐尤應拆毀稽查以塞弊源而清匪
孽臣等酌議善後數條繕列清單恭呈

御覽如蒙

允准卽責成原任布政使吳俊妥爲經理如行之有效則

將惠潮各屬次第查辦以及通省更爲完善謹

奏

一保甲之法宜隨地制宜以收實效也查博羅永安二縣添弟會匪結盟聚衆焚殺抗拒其始不過奸民搶竊什伍爲羣厥勢甚易剪滅因其父兄容隱隣保明知不首遂至釀成事端保甲不行流弊至此查該二邑跬步皆山民居錯雜有土籍客籍之分而客籍之中其祖貫又復不一族別類殊勢難混一今欲編查保甲勢不能編客入土又不便土客分編顯存形跡致啟猜嫌

應委明幹之員分赴各都各約每戶編一小門
牌註明姓名年歲行業弟兄妻妾子女及寄居
人口揭於各家門首於是每十戶編爲一大牌
設一牌長牌長若由官選充則恐其不協人情
且土客之間稍存意見弊易滋生應令一牌十
戶內土民客民公同保舉一人充爲牌長取具
不敢袒土欺客及袒客欺土衆心允服甘結繳
縣仍於大牌內註明牌長姓名揭於村口又累
十牌爲一甲造一甲冊令十牌牌長公舉一人
爲甲長掌管甲冊又累若干甲爲一約造一約

冊令各甲甲長公舉一人爲約正掌管約冊均照舉充牌長之例取具各牌長甲長甘結繳縣其編定之後牌長每日執牌親往十戶門首的審有無出入死亡人口逐一核對於牌內註明添減並查明有無偷竊淫殺隨時層遞呈報印佐官懲辦其有結盟拜把不法及土客互讐重情由牌長飛報甲長約正轉報該縣卽時查拏如有隱匿卽將牌長等分別治罪並將該管文武員弁叅處仍令十家互爲保結一家有犯十家同坐如此層層鈴束善勸惡懲又復寓分於

合地方可期安謐保甲之成效著矣

一約正宜優以禮貌也查一約之內戶口既多客土不一約正之責任綦重若以賤役視之不足以警鄉愚應於致仕鄉宦及貢監生員中遴選充當以三年爲率如三年之中該管鄉里並無聚衆結會不法等事將該約正優加獎勵如係鄉宦貢監納職則由縣詳請咨部給予加級頂戴生員則申請學政遞行拔補增廩增廩則給予敘職卽行退約由地方紳耆公同保舉另選充當并不准公同具呈請留以杜盤踞之漸如

三年之內敢有把持武斷逞私圖詐及徇庇匪徒不行首報查出隨時分別詳請褫革從嚴究辦如此彰瘡分明於地方似有裨補

一博羅永安二縣應添撥弁兵以資防守也此次會匪滋事官兵調派較多此時歲事撤兵該二縣處萬山之中應酌量添兵以資防守前督臣吉慶將酌添兵數具

奏今詳加核議原奏尙有不敷及無須安設之處唯該二縣拜會之民旣多若各處零星散置民多兵少轉有勢逼人會之事而且一時調集不便應

請仍照原數於各要隘一二處所安營兵威既
多人多耳目不便亦有互制之形查博羅縣係
惠州協左營管轄原分防千總一員外委一員
兵五十一名應添兵九十九名外委一員合原
防共兵一百五十名千總一員外委二員仍歸
惠州協副將統轄博羅縣屬之羅溪營范家田
地方險要應於羅溪營設千總一員外委一員
兵一百名於范家田設立把總一員兵五十名
均歸提標中營叅將統轄其永安縣城係惠州
協右營管轄原分防都司一員千總一員外委

二員兵一百四十九名除分防各塘汛外實存
城都司一員千總一員外委一員兵五十七名
應於縣城添兵一百四十三名外委一員合原
防共兵二百名都司一員千總一員外委二員
應立爲永安營以存城千總爲管轄以新設鐵
籠嶂守備爲兼轄以存城都司爲統轄歸提督
巡轄永安縣屬之鐵籠嶂九禾市二處係通縣
適中之地山形深峭易於藏奸應於鐵籠嶂設
守備一員外委一員兵一百五十名九禾市設
千總一員外委一員兵一百五十名卽以新設

九禾市千總爲管轄以新設鐵籠嶂守備爲兼轄以都司爲統轄歸提督巡轄以上共添兵六百九十二名守備千把外委十一員應於督標五營內抽撥千總一員外委三員兵二百四十六名撫標左右二營內撥外委二員兵二百名提標五營內抽撥千總一員把總一員外委二員兵二百四十六名尙有鐵籠嶂應設守備一員無可抽撥應將惠州協駐防歸善縣城之千總一員裁撤於鐵籠嶂設守備一員如此扼要庶幾有裨守禦其防守兵丁原缺照數由原營

挑補撥防之後缺出若再由原營撥送則兵丁
離籍赴防未免苦累應於撥防地方就近召募
田各牌甲約正等公舉誠實壯健能習技藝之
人驗補並責其並無爲匪甘結通緝所有應行
修建衙署兵房及巡營會哨如何稽察之處另
行查明咨部辦理

一城垣亟宜修固也查博羅永安二縣俱依山爲
城博羅之城尙屬鞏固間有塌損之處應令該
縣自行粘補永安則四面皆山峰巒林立處處
可瞰城中該城基址本狹城身又極卑薄此次

會匪薄城滋擾城內衙署倉庫監獄民茹頗爲
危急今賊平事定亟應委員確勘相其形勢培
厚增高俾嚴疆得資保障其應築丈尺工料按
照中城則例查估不得因仍簡陋俟勘明分別
奏者辦理

一添弟會業經剿辦此時仍應嚴禁其牛頭會應
遵

旨永行禁絕以杜衅端也此次博羅永安會匪糾集多兇
肆行不軌殺人焚屋罪大惡盈經大兵攻剿大
愍駢誅其餘助惡脅從分別斬梟發遣固足以

仲

國法而快人心此時仍應申明嚴禁永絕根株至該匪等起事之初百姓保護身家按牛派費僱募鄉勇以爲守禦之謀於是遂有牛頭會名色其心雖非好爲亂階難保無不逞之徒藉報爲名乘機劫殺甚而擇噬村愚私肥囊橐是一會滅而一會復熾誠如一

聖諭必致釀成漳泉械鬪之習閭閻難冀救安亟應一併禁止以杜衅端其禁之之法卽責成牌長甲長約正逐戶編查明白開導每十家取聯名互結

一紙註明如十家之內有結添弟會牛頭會之人卽據實舉報若容隱不報別經發覺卽行連坐該牌甲約正等耳目較近間見尤真弭患未形結會之風可期盡息

一各處寨柵應行拆毀并永禁修築以免賊匪竄匿也查博羅永安二縣會匪滋事村民多於山頭嶺角修築寨柵以爲捍衛之計亦有賊匪糾衆結寨在內藏匿者奸良淆混分別爲難現在飭令文武將各處寨柵全行拆燬惟愚民迷惑或因已築之寨惜不肯拆或因已拆之寨土木

尙存又私行修復一處如此各處效尤地方文武查辦不力日久仍成匪窟關係實屬非輕應責成各牌甲約正等隨時稽察如民間仍有修築寨柵者卽就近呈報營汛移知文員會同查勘除將寨柵立時拆燬外其爲首修築者如係會中投撫之人枷號半年杖一百隨從修築之人枷號三個月杖八十如係平民爲首枷號三個月杖八十隨從枷號一個月杖六十若牌甲約正等不行呈報經文武員弁查出該牌甲等與爲首修築之人同罪查寨柵非如器械火藥

可以閉戶製造山巔巖際一望而知如該處文武失察非止疎玩應嚴叅從重治罪如此明立科條庶不敢復萌故智而匪徒亦無所憑依

一私造軍器應行嚴禁也查烏鎗礮位與夫藤牌器械久奉嚴禁不許民間私造惟長槍刀矛等項因例無明文民間借防禦盜賊爲名不啻家藏蓄而欲禁私蓄必先查私造惠屬設爐打造兵器間有營兵貪圖重價賣與民間以致聚衆鬪狠輒釀事端應責令各營該管將弁將該營能造器械之兵造具名冊申送所有造過兵

器鑿成某營某兵字樣在上并取不敢私賣結狀倘造成之後不鑿姓名混賣匪人察出照例嚴行治罪并將該管營員叅處現在民間所有器械地方官悉令赴官呈繳量行給賞並令牌甲長約正將有無私藏兵器隨時稽查呈報是亦防患弭盜之一端

一鐵廠最易藏奸宜設法嚴禁也查永安縣上黃沙地方有鐵廠一處遼谷深巖村落寫遠鐵商開採鐵沙赴惠州府城及廣州佛山等處售賣原有層層稽核惟其開採時必須召募工作往

往有不逞匪徒及犯事在官之人竄匿其中受
僱趁食或採砂鑄鐵打造犯禁器械最易滋生
事端似宜添設營汛以資彈壓稽查但事屬營
兵俱能鑄鐵造器若就廠設汛誠恐不爲之兵
以私鐵製造違禁器械圖利售賣是欲查弊而
適以滋弊應責成該管巡檢按旬赴廠稽查並
令開廠之人按月出具並無窩匪及私造違禁
器械切結呈縣通繳倘該商作奸捏結及巡檢
得賄徇隱准令附近約正等赴縣呈報將廠封
禁另行召充並治該巡檢及該商應得之罪窩

奸私鎔諸弊可以漸絕奉

硃批該部議奏

嘉慶八年二月初一日

奏爲惠潮民情獷悍請變通准令道員就近調兵以資

整飭恭請

聖明

訓示事竊查各省巡道多帶兵備職銜載在

勅書鐫之印篆其實並無管兵之責緣

國家文武分途統歸總督節制武員不得干預地方文

員亦不管轄營伍立法本爲盡善臣訪察粵省情

形如督糧肇羅二道本非兵備其餘南韶高廉雷
瓊三道所管地方民俗尙不甚强悍惟惠潮嘉道
所管之惠潮二屬民間結盟械鬪之案效尤接踵
當其倉卒起事文官衙門差役民壯人少不能查
拏欲移營調兵則定例不奉總督牌劄不准輕動
惠潮距省數百里及千餘里不等文書往返逾旬
往往小事釀成大事總因格於定例就地不能調
動一兵以致輾轉糾結滋蔓傷生及事後緝拏地
方官畏於生事多聽其自送兇手而爲首之惡不
除過時依然械鬪從前不肖官員每因械鬪訛詐

民人銀錢今則械鬪之後民人轉可挾制官府且
本屬幸遇豐年錢糧或少爲交納若遇歉薄之歲
竟至抗糧不納官府代賠者居多是民習驕驕
逆而官府乃至束手無可如何似此因循隱忍實
有日甚一日之勢臣欽奉

恩命來至粵東目擊情形實深憂慮天良具在不敢不直
切陳奏惟有仰懇

皇上俯念惠潮二屬兇頑惡習亟宜懲創

准令該道一遇地方有事卽於該處各標營內就近咨調
兵弁協同彈壓擒拏查粵東大案動輒數十百人

其勢不得不須兵力遇有賢能懂事之員或私自
出資聘請兵丁辦理則此一事必能結實穩妥否
則苟且因循至大不可問且與其聽其私自借兵
莫如奉公准其咨調得以及早懾以威嚴使始燃
之火立時撲滅不特於禁暴詰奸之道大有裨益
而夷獯襍處之方

國體亦極有關係再查現在廣州府屬之海防理猺二
同知因彈壓夷獯各有兵一百名自爲一標準其
自行差操列於營制巡道亦係監司大員非丞倅
守令可比茲請准其咨調兵弁事後卽便歸伍於

營制並無更移似可變通辦理但應立定限制每
調不得過五百名亦不得因准咨調遇事張皇以
致激生事變臣詳查案卷確核情形又復博採衆
論實非他省他道可比原欲列入善後章程辦理
因礙於定制部議難以准行故不辭冒昧專摺奏
懇

恩俞謹

奏

嘉慶八年二月十九日軍機大臣字寄奉

上諭據那彥成奏惠潮地方民情獷悍遇有結盟械鬪之

殊

案文官衙門差役民壯人少難於緝拏又格於定例不能調兵以致釀成大案請嗣後准令惠潮嘉道咨調兵弁但不得過五百名等語惠潮地方民情獷悍抗糧械鬪之案接踵效尤自應嚴行懲創儗如那彥成所奏准令道員調兵以便查緝事不可行國家設官定制文武分途不容兩有干預巡道係屬文員若派令管轄弁兵不但呼應不靈於體制亦屬未協且該管提鎮將備等官轉得置身事外向來緝拏奸匪原不獨責之文員卽所在營員亦均應稽查彈壓總督統轄閩省文武惟當於平日留心整頓嚴飭該營員等幫同文員查緝匪犯

遇有地方要務應派兵彈壓緝捕者經文員知會一面
申報總督一面派兵辦理該營員等焉敢不畏懼導導
若必令文員調派兵丁設有械鬪等事應行緝拏之案
地方官因有兵可調紛紛派往遇事張皇甚至激成事
端尤爲可慮且帶兵一事本難責之文員該省惠潮道
一缺現係漢員卽滿員中亦豈皆熟悉兵事况如閩省
漳泉一帶地方民俗刁悍與惠潮等屬相似向來亦俱
無道員調兵之事設該省督撫等亦欲仿照辦理紛紛
瀆請更張舊制成何政體地方公務全在文武一心和
衷協力自可緝暴安良永臻寧謐何必令文武官員攜

越職掌乎所有那彥成請准道員調兵一事殊可不必
倭什布到任後卽遵照諭旨將營伍事宜加意整飭以
期於詰奸有神那彥成原摺并抄寄閱看再永安鐵籠
嶂會匪滋事之處本日已據那彥成奏到勦辦完結民
情安堵惟爲首之曾鬼大溫亞利二犯尙在逃匿倭什
布於到粵後務當飭屬嚴拏毋致漏網仍將現在是否
就獲之處先行附便具奏

嘉慶八年閏二月初四日會同兩廣總督倭公什
布廣東巡撫瑚公圖禮

奏爲續獲首逆溫亞利與該犯全家及著名頭目陳有

達等審明并鄰縣另獲首匪溫亞石等傳受不法情形分別辦理根株淨盡事竊查永安全境敕安撤兵藏事經臣那彥成孫全謀於由青溪回駐苦竹派時專摺

奏

聞在案因逸匪曾鬼六溫亞利及著名頭目陳有達何亞開賀三隴等在逃未獲臣那彥成回駐惠州府城督飭文武嚴密查拏詎該犯等自官兵攻破鐵籠嶂之後自知罪大窮竄深藏連旬以來所委各路員弁帶領線勇兵役設法尋踪不但村市圩場查

歷殆遍卽巖洞坑箐亦無不逐一搜探茲據惠州
府知府楊楷督同經歷陳國銓巡檢董源太於羊
樹礫地方拏獲首逆溫亞利一名又據各處紳衿
將頭目陳有達賀三隴何亞開三名拏交各委員
解到查溫亞利與已正法之黃亞程龔釐戡膽鄒
鳳翔在鐵籠嶂聚匪抗拒俱稱大王該犯猶爲悍
黠其陳有達係上年曾清浩等滋事案內已投復
叛之犯何亞開係與曾清浩等同時入會之犯均
經奏明有案而賀三隴於官兵攻破鐵籠嶂之前
潛行下山招集醜黨欲行接應後聞鐵籠嶂打破

卽四處逃匿今俱經弋獲巨惡已無漏網賀三隴
被獲時復拒殺鄉勇一名更爲兇惡可惡臣那彥
成當提陳有達何亞開賀三隴三犯逐加研訊據
供始而隨同溫亞利龔釐戩膽會清浩等在天字
嶂起事伊等俱爲大頭目各處焚殺復同溫亞利
上鐵籠嶂盤踞抗拒各等情當將該犯等斬決梟
示其溫亞利一犯係溫登元之姪首先結拜添弟
會情節尤重因先據興寧縣知縣莊自儀稟報訪
得該縣石馬墟地方有匪徒溫亞石等自永安潛
回在鐵山嶂糾衆拜會之事當卽密差勇役於江

西廣東交界地方拏獲首犯溫亞石一名又緝獲
從犯溫趙頭溫石二劉山子徐司務卽徐昌高溫
何十滿溫紹伯卽溫集得溫觀生溫淑英等八名並查
出逆詞表文本職解赴省城審辦等因查永安興
寧二縣疆界毗連溫亞利與溫亞石同姓而溫亞
石又自永安潛回聚衆恐其有互相勾結之事必
須質訊明確方可究底裏而淨根萌臣那彥成辦
理永安事竣臣倭什布已度嶺入粵臣那彥成卽
於二月二十四日自惠州回至省城連日與臣倭
什布瑚圖禮提犯公同鞫訊據溫亞利供上年五

月有興寧西鄉人溫亞石卽溫亞四來伊村內傳授伊叔溫登元及該犯添弟會抄本逆詞伊叔與伊同糾官粵瓏龔鰲戡膽會清浩賴東保等入會復輾轉糾人伊叔被人告發到官監斃溫亞石卽逃回興寧到九月內溫亞石寄信與伊說在興寧地方又已糾人拜會將來大家照應伊卽帶同官粵瓏等在天字嶂地方殺人豎旗四處焚掠後又同黃亞程龔鰲戡膽等盤踞鐵籠嶂抗拒等情供吐不諱復提溫亞石與之質對確係當日到伊家傳授逆詞之人復據溫亞石供出於不識姓名舊

書攤上買得抄本逆詞表文內有印文隨照雕木
戳傳授與溫登元叔姪又在興寧本籍糾人拜會
聞溫亞利們被官兵攻圍不敢滋事旋被官府訪
聞緝拏逃至廣東江西交界地方被本縣差役跟
獲等供復提溫趙頭等逐一訊問除徐司務卽徐
昌高溫觀生溫淑英業已在監病故外據溫趙頭
溫石二供聽從溫亞石糾約入會又復輾轉糾人
據劉山子溫何十滿供聽從溫亞石糾約入會據
溫集祿供聽從溫趙頭轉糾入會各等情查溫亞
利首先拜會糾聚多人焚殺抗拒罪大惡極應照

大逆凌遲處死律凌遲處死溫亞石卽溫亞四起
意糾夥結拜應照匪徒潛謀糾結復拜添弟會名
目搶劫拒捕斬決例擬斬立決梟示溫趙頭溫石
二聽從入會又復輾轉糾人均應照聽從被脅而
素非良善者絞決例擬絞立決臣等於審明後卽
恭請

王命飭委按察使卹庭滄督標中軍副將保興將溫亞利
等分別凌遲斬梟處絞溫亞利之母與伊兄弟三
人已經拏獲現禁縣監俟查明照例緣坐其劉山
子溫何十滿卽溫紹伯溫集祿止於聽從入會並

未轉糾亦未隨同搶劫應於溫趙頭等絞罪上酌減一等杖一百流三千里仍比照叛案干連流犯發往烏喇地方安插管束查永安會匪滋事始於天字嶂而終於鐵籠嶂仰仗

聖主天威次第殄殲俘獲而溫亞利及陳有達等竄逃山谷未淨根株未免尙煩

聖厯今已盡行弋獲並予嚴誅是此事大局已臻完善又究出溫亞利等叔姪拜會係鄰縣之溫亞石越境傳授而首夥亦已成擒審明辦理尤足以清匪孽而靖人心至曾鬼六一犯尙無下落想窮蹙游魂

亦不虞稽獲查該犯實非會首亦並無勾結之事
其原委經臣那彥成詳細訪察現在另片奏明惟
既係會匪亦不得聽其漏網仍須上緊嚴拏務獲
其與溫亞石案內逸犯多係聽糾之人仍令該
地方官上緊緝獲歸案辦理至此案拏獲溫亞利
之惠州府知府楊楷到任在會匪起事之後數月
以來帶領勇役搶隘捕匪始終出力本地紳衿俱
聽其約束前經緝獲首逆龔釐戢膽今復將巨匪
溫亞利設法搜獲以完大局實屬勇幹向前其隨
同查緝之經歷陳國銓巡檢董源太亦屬出力其

應否

加恩分別均予鼓勵之處出自

聖主鴻裁至博羅永安二縣難民撫卹業已辦竣其善後
事宜責成原任藩司吳俊次第辦理臣那彥成於
拜摺後卽遵

旨起身進京恭復

恩命謹

奏

嘉慶八年閏二月二十五日軍機大臣字寄奉

上諭那彥成等奏續獲首逆溫亞利等分別定擬一摺已

交刑部核議具奏其懇請鼓勵各員之處亦均降旨分別加恩矣至另片奏查明博羅縣會匪曾鬼六並非首逆一節據稱該犯本名鳳蘭因向來游蕩失業與人尋衅種種擾累地方居民懷恨粵東稱人之狡謫爲鬼六因以鬼六名之上年會匪滋事時遂將該犯名字誣列其實並無勾結抗拒情事其勾結爲首之鄒鬼六一犯早經官兵拏獲正法與該犯無涉訊與各供均符等語曾鬼六雖非爲首要犯其鬼六名字係地棍通稱但該犯擾累閭閻本非安靜之輩且曾經入會尤屬不法倭什布仍督飭地方文武認真緝拏俟審明後照例辦理

具奏那彥成前已有旨令其前赴浙江審辦職貢張江
梅呈控鹽務一案著卽遵奉前旨取道赴浙審明具奏
再行回京

嘉慶八年正月十七日

奏爲普天同慶川陝楚大功告成恭賀

天禧事臣伏讀川陝楚大功告成

諭旨不勝欣抃當卽傳集文武員弁敬謹宣示無不踴躍
歡騰額手稱慶隨卽刊刷謄黃俾窮鄉僻壤爭先
傳誦同深慶賀緬維教匪自乾隆六十年戡定楚
苗之後起事由宜都當陽等處闖入豫省蔓延至

陝隴陝及川流竄擾攘肆爲民害

高宗純皇帝運

神機

廟算命將出師屢殲首逆嘉慶初年

授璽

聖壽日高猶時時以小醜未平黎庶未安上煩

殷厯迨至

鼎湖龍馭以前仍有

望捷之什

皇上每與廷臣道及莫不欷歔愴惻凡謁

陵致祭未嘗不因此而倍增悲感誠

繼

志之孝思無窮實亦中外大小臣工并億萬民庶所念念

不忍忘者

臣

目見耳聞尤深焦急

皇上丕承基緒爰

簡經畧督師

指授機要數載以來渠魁授首更僕難終徒因餘孽鼠竄

狼奔輾轉裹脅致有紛紛羣醜未易急切聚殲

臣

曾履行間備悉匪徒伎倆雖未嘗敢拒

天戈惟恃出沒靡常久煩剿捕

皇上孝思敦摯追維

高宗純皇帝遺念綦切無日不厪

聖懷思拯三省民人於水火中卽偕宇內羣生長享

太平無事之福

臣仰見

萬機而外

訓飭戎行信賞必罰足令將士用命是以蟻屯蟻聚寶繁

有徒者至是胥歸殄滅惟

聖念之憂勤著

天威之震疊上成

高宗純皇帝未竟之緒下綿

國家億萬年無疆之休

大孝光昭

武功耆定實爲天下臣民之所同慶自此我
皇上紓戡亂之心更可從容以

勤求治理將見吏肅民醇風移俗易

集禧延洪罄無不宜者均於此時也

臣受

綏養之

殊恩荷矜全於格外夙閱邸抄幸事機之順利茲聞凱奏
果喜報之遄來際此三省之么孽全消七年之戎
戈頓止共安樂利永慶

昇平

臣

奉使粵東未復躬親舞蹈

宮壘惟有望

闕叩頭雀躍歡抃謹繕摺隨報

奏賀

天禧仍卽事差進京恭遞

如意伏祈

皇上睿鑒謹

奏奉

硃批普天同慶率土臚歡感荷

天恩

考佑倍深寅畏益求治安曷敢少懈

附告示

示爲剴切曉諭事照得永安縣會匪曾清浩等聚衆滋事欽承

聖天子垂憫一方之民厄於水火期登衽席而安全之

簡命本閣部堂馳赴永邑相機籌辦現已行抵粵東省垣當提曾清浩官粵隴賴東保等親提鞠問嚴行夾責令其備受官刑該犯供認均係焚劫村墟毒害良民之首犯是於法旣不准自首於罪亦絕無可寬現在會同廣東巡撫恭請

王命將曾清浩等綁赴市曹正法傳首梟示後本閣部堂

卽尅日東蒞布

皇仁以撫輯獨殘肅

天威而殲擒首惡俾哀鴻安集山宇澄清第念永邑居民
性鷙而悍聞其平時每以片言忤觸卽逞兇斃命
矧遭茲焚殺淫掠之慘而著名兇匪轉置不問其
中有脫網潛歸一經民勇知覺肆其積忿恣意戕
害抑知庶民嚴端殺之刑

國典重交讐之法倘逞怨殺戮則良民不良轉犯擅殺
之罪且此等焚殺兇徒本屬法難寬縱與其叩恨
而私行殘斃身列爰書何如經官而明正典刑快

紆積忿本閣部堂深慮爾民之無知取戾也合先
剴切曉諭爲此示諭該縣居民及諸色人等知悉
查本案原係讐殺起衅尙非有意謀逆爾等如有
被害者靜候地方官查明撫卹所有本案不法匪
徒前經正法各犯供指有名者自有冊籍可稽卽
使未經供指而此種兇悖首惡斷不能匿跡消聲
本閣部堂自當飭令將弁上緊搜拏務使首犯盡
獲以正

國法而快人心倘此番誥誡之後仍敢抗違不遵擅行
讐殺如係會匪殺斃良民固當處以凌遲極刑並

將家屬緣座若係良民殺斃會匪亦照擅殺律擬抵其有身被逼脅無奈從賊者准予投首爲從者一概不追論以彰法外之仁如被脅及爲從之人有能將著名首犯縛獻者除免罪外仍與重賞總期鯨鯢就戮悉清頑梗之囂氛庶幾墟市無驚共仰

昇平之盛治各宜凜遵毋忽特示

示爲剴切曉諭事照得本部堂前赴青溪一帶審辦鐵籠嶂匪犯沿途有民人紛紛控告會匪懇求緝拏者查永安會匪前此滋事首匪曾清浩官粵

瓏賴東保等因係首惡業經正法至如年前復上
鐵籠嶂屯聚之匪實屬怙惡不悛已經提督率領
將弁官兵痛行勦殺至四五百人其逃出之首匪
黃亞程邱亞晚龔釐戩膽林亞著練朝龍僧蓮長
等均就戈獲惟曾鬼六溫亞利尙在免脫餘匪亦
拏到三百餘人現在嚴審卽日盡法處治倘日內
續獲曾在鐵籠嶂逃出者自應歸案辦理此外如
係從前曾經拜會入夥後因悔罪受撫前經出示
曉諭准其回家安業復爲良民不復追其既往合
行剴切曉諭爲此示仰控告會匪人等知悉爾等

毋得挾怨逞私告理前此未經痛勦爾等自應不
平現在鐵籠嶂之犯業已誅殺殆盡破其巢穴戮
其妻子論數亦已足以相抵至未上鐵籠嶂之犯
又不敢別生事端卽於平民無異所有疊瀆呈詞
全不收理如有妄行指拏或挾讐焚屋殺人者卽
將軍法從事決不寬貸各宜凜遵特示

示諭居民人等知悉照得爾等遭匪徒焚掠戕害
本堪憐憫本閣部堂調集官兵將竄聚鐵籠嶂匪
徒痛加勦戮臨陣殲斃三四百名生擒四五百名
訊係頭目及曾經殺人放火者分別凌遲斬決此

爾等所共見共聞者爾等受害之家兒匪徒駢首
就戮怨憤亦可漸平何得復行臚列營人姓名紛
紛控告豈官兵誅戮不下千餘人尙不足償爾等
被害之命耶況首匪曾鬼六黃亞禮溫亞利等入
名現在懸賞購拏爾等探得踪跡不妨赴營縣密
稟引拏爾等不但可除害並可得重賞迺自攻破
賊巢後陸續拏獲首犯黃亞程龔釐戡膽耶亞晚
等正法而曾鬼六等尙在逃未獲並不見爾等躡
探踪跡赴營縣稟報徒羅列被害人姓名圖洩私
忿不知

國法既伸私忿當釋爾等均係無知愚民恐爲無賴訟
棍希圖激生事端以遂其私心之所慫恿本閣部
堂深悉種種情弊此等伎倆斷不能行毋得妄想
爲此示仰居民人等知悉嗣後呈控會匪呈詞全
不受理各宜回家安業不得聽訟棍播弄嘵嘵瀆
控致干未便特諭
爲曉諭鄉民敬

聖畏

法事照得博羅縣會匪首逆陳爛展四起意滋事時於本
年八月初八日帶領賊衆在該縣之栢塘墟

關帝廟內卜問往東南永安抑往西北羅浮山焚掠惟
時

聖帝賜簽默誘以不利東南利於西北該匪等卽遵向
西北响水善政司一帶焚劫正逢提督大兵由此
路進剿該匪等望風敗竄匿入羅溪營中迨大兵
攻圍該匪等佔據險隘抵死抗拒正在進攻之時
忽見賊營所裝火藥無故自焚匪徒驚竄羅溪營
遂破該匪等以

神靈不佑屢遭敗竄膽敢肆其兇惡毀

像拆廟然不旋踵而卽被擒授首此事爾等百姓想俱

聞知查該匪陳爛屐四首先謀逆焚劫村莊其荼毒爾人民者不少然當時若非

聖帝誘往西北不遇大兵則勢必焚掠東南爾人民必更遭其蹂躪乃蒙

神靈默佑俾不稽誅是

神靈之惡惡善善者甚明其默喻爾人民以爲善惡惡之意又甚著也夫我

國家自定鼎以來

列聖相承將二百載

深仁厚德其被於爾等者爾等愚昧或忘

帝力而不知卽如

關聖帝君威靈素著固爾等家祀戶享之

神而自

本朝以來効順昭靈屢膺

封爵此皆爾等之所共聞卽以陳逆之小醜跳梁尙且默

佑而顯戮之更可見我

國家億萬斯年百靈擁護矣爾百姓亦何事而不爲

盛世良民必欲自羅法網而至於爲

神所殛乎夫

神之不佑卽

天之不容也焉有人生世上

天不容之而能長久者且

神既惡惡而誘之於禍必能好善而畀之以福爾等果
能棄惡從善何慮不轉禍爲福乎本部堂奉

使來粵深以撫綏爾等爲心茲以

關聖之靈特遣官前往致祭擬卽重修

廟宇以答

神庥特恐爾等僻壤窮鄉不盡知悉爲此示諭軍民各
色人等嗣後爾等務宜敬

神畏

法安分守已父子兄弟交相勉勸以陳逆爲前車之戒則
將來同享

太平之福而迓

神靈之庇者本部堂深於爾等有厚望焉毋違特示

示爲亟飭查報並行曉諭事照得

聖世不廢刑誅民俗尤資禮教彰善癉惡並著於壁經予

祀

賜旌久垂爲

國典肆兇敢行悖逆明憲在所難寬受害及彼貞良遺
魄定應猶毅故有立坊表於患難之中則必議優

崇於卹綏之後用昭物則庶愜人心比者博羅永安等處會匪狂馳以致城市鄉村之間居民毒虐原火之燄孔張池魚之殃不少一時玉石同燼何所區分所在鋒鏑難逃盡歸劫數固不能辨其何賢何愚亦徒付諸可悲可憫已至變生倉猝卽有矢死之心憤發臨時遂奮捐軀之力凡孝義節烈均堪嘉尙者荷實跡之可徵必載傳於已事或泣血以刺讐胸或慷慨而撓賊刃或從容而守潔或凜烈以全貞是皆正氣之攸鍾允宜風聲之亟樹也本閣部堂奉

天子命馳驅而來懲姑息則已戮鯨鯢撫瘡痍而欲歸鴻
雁業已遽派員升次第設施復念匝野蟲沙而外
百里陰風窮山灌莽之中一般燐火其間有英魂
附草碎骨生香若不闡此幽光曷以伸夫大義現
在劄飭軍營効力原任布政使常齡督飭惠州府
知府并博羅永安各縣知縣迅卽詳訪確查該處
被賊而死者所有孝義節烈紳衿軍民婦女跡其
殺身成仁之事採諸動色興嗟之言使奇行不至
就湮盛節可以爲勸本閣部堂自應據實陳

奏仰望

恩施或列祀典或表里門庶幾除惡務盡善善從長編廬
比屋皆有興起之心海濱山陬共享

昇平之福該布政使等毋得濫受捏飾虛詞不加察實
反致埋沒美事滋多脫遺合並曉諭爲此示仰博
羅永安被擾地方人等知悉各憑聞見之真闡揚
人善勿存混淆之見圖遂已私公同結報聽候核
行果符輿論無愧典章本閣部堂有厚望焉本閣
部堂仍捐賞銀五百兩飭令各該縣於城中擇地
另立祠宇用彰幽隱之光以宏教化之道公善有
心各宜知悉特示

示爲曉示餘匪申明約法以廣

皇仁事照得匪黨結會倡自兇徒持械相戕遂至讐殺以
成此變本閣部堂法嚴首惡意切安良業將會清
浩等審明斬首梟示以伸

國法以快人心其餘各犯始緣逼脅而入夥繼爲鄉黨
所不容竄伏深山不敢歸里進退實爲狼狽良民
輒復懷疑聚勇戒嚴彼此相持不下職是之由本
閣部堂仰體

皇上之仁寬爾等自新之路准其投首速改前愆令親族
鄰佑保結赴本管官處呈明領回洗心安業並聽

紳耆約束教訓該紳耆鄰保等亦不得因其曾被
脅從多方挫辱台行出示爲此示諭脅從餘匪知
悉爾等不敢抗拒官兵尙知畏法因而竄逃山谷
計止貪生特開誠布公亟宜各釋私忿速尋保領
免于

憲典藉獲餘生此本閣部堂所以爲爾等謀安全之計
申誥誠之文者至深切也爾等具有天良應知省
悟宥其既往相率偕來倘若冥頑不靈負固不出
則是自絕其生一旦玉石俱焚悔無及矣其各凜
遵毋違特示

示爲明白曉諭事照得永安縣總障餘匪負隅本署部院就近調兵勦捕專治以抗拒之罪並非將已經悔罪者全行勦捕也茲官兵於月之初七八兩日連獲勝仗攻破賊巢全行殄滅至從前業經悔罪投誠回家安業者原未飭拏誠恐爾等心懷疑懼尙未周知合行出示曉諭爲此示諭矜耆軍民人等知悉爾等義民卽便遵照前示互相知會速行歸業永享

昇平之福毋得再集鄉勇私相讐殺餘匪業已剪除亦可消其積怨不必再行紛紛呈告此後有讐殺者

以擅殺論有深山築寨者以抗官論有嘵嘵不已
輒復越控者必將峻訟之人根究嚴懲

國憲具存斷難寬貸均宜凜遵毋違特示

示爲再行明白曉諭事查鐵籠餘匪自外生成恃
險不服本部堂遣人上山委婉開導至再至三乃
該匪等依然負固不知向化是以不得已調集諸
路大兵進剿不日即可撲滅爾等從前受撫各安
生業之人均係良民勿得自相驚擾紛紛上山逃
避理宜各歸村落安享昇平之福切莫再行煽惑
并仍准告當鄉勇如果剿賊有功分別加賞予官

有差爲此再行曉諭各宜醒悟勿致自悞此諭
示爲明切曉諭事照得鐵籠嶂匪犯築居山寨煽
惑愚民經職員杜仁溥張景仰及兵丁差役先後
入嶂諭以利害冀其解散乃敢負固不服將杜仁
溥等一併殺害凶殘已極叛跡昭彰本閣部堂調
集兵勇四路兜擒將鐵籠巢穴立即蕩平殲斃數
百人擒其首惡龔釐戡膽黃亞程邛文隴邛亞晚
等盡伏刑誅仍分布兵勇緝拏逸犯曾鬼六等釜
底游魂斷難遠逸其餘被脅愚民經此番痛懲之
後皆亡魂喪膽不敢復滋事端地方旣就平靜兵

勇卽宜裁撤合行出示曉諭爲此諭永安闔縣紳
耆軍民人等知悉自示之後各 勇卽速遵照各
歸鄉里共享

昇平除逸匪曾鬼六溫亞利何亞開鄒鳳翔黃亞禮賀
三隴曾字宏陳有廷陳亞四卽陳棟等九犯按名
緝拏務獲辦理外其餘被脅愚民皆回家安業不
得妄拏所謂殲厥渠魁脅從罔治爾士民宜共體
此意無負本閣部堂諄諄告誡之苦心各宜凜遵
毋違特示

刑部奏公奉使粵東奏議卷六